

FEDEA eta EKINTZA

Karismatikoak Erroman

1968.ean sortu zen USAn katoliko karismatikoen oldea.* Pittsburg-eko «Duquesne» Unibertsitateko ikasle eta irakasleen artean, hain zuzen ere. Gaur egun milioi erditik gora dira mugimenduko lagunak, eta ehun bat herrialdetan banaturik daude.

Kristauen lehen garaietako elkarteetan gertatu ohi ziren karisma edo dohain harrigarriak berriztu nahi dituzte gaurko kristauen artean. Gaur ere gertatzen direla aitortzen dute, eta beren bileretan* bizi dituztela.

Beren nazioarteko batzarrea Erroman egingo dute aurren. Hamar mila lagun edo bilduko omen dira batzarre horretara. Zuzendaria, Ralph Martin. Batzarrean parte hartuko du Belgiako Suenens kardinalak ere. Erromako «Urte Sainduan» Erroma bera aukeratu dute batzarre hau egiteko, honela Aita Sainduari beren atxekimendua* adierazteko, eta Erromako peleginazioarekin lotu nahian.

Datorren maiatzaren 16tik 19rarte ospatuko da batzarrea, Mendekoste eguna 18an dela gogoan edukiz. (Patxi Kortabarria).

Espainiako Eliza eta Estatu tirabiraka

Azkenaldi honetan, Madrileko Bikalgo* batetan jarriak geneduzkan geure begiak, han eratzten ari ziren kristau batzarre baten berritasunak erakarririk.* Bikalgo horrek Vallecasko du izena, eta, Tarancón artzapezpikuaren esanez, mende erdi honetan Madrileko leku behartsu eta premiazkoenetako bat da, han egin diren konponketak kontuan izanik ere.

Azken hilabeteotan, laiko eta erlijioso eta apezak, elkar harturik eta apezpiku ordezkoa buru dutela, eliz azterketa lanean ari izan dira. Elizak mundu honetan duen egitekoa ikertu* nahi izan dute, eta Vallecasko aldeko gizarte problematika ugariari erantzun bat eman, edo argi egin gutienez. Gero, lan sakon eta serio hau, martxoaren 15etik 23ra bitartean egiteko ziren «Vallecasko Kristauen Lehen Batzarrean» aurkeztuko zuten, hara bilduko ziren 1.500 lagunengatik eta azterketarako. Batzarre honek izpiritu berritzea eta gizatasun berritzea zuen helburu, eta, hain zuzen, Madrileko artzapezpiku Tarancón beraren itzala eta babesa zuen.

Hala ere, pastoral esperientzia honen berritasunak batetik, eta hortik etor zitezkeen ondorioek bestetik, zenbait susmo eta uste oker piztu zuten, Tarancón beraren eta Vallecasko apezpiku ordezkoi Iniesta jaunaren pastoral joerak salatzeraino, Elizaren dotrina aitzakitza harturik. «Iglesia-Mundo» kristau eskuindar aldizkariak zabaldu zituen kritika hauk.* Madrileko eliz prentsa bulegoak* ohar bat zabaldu zuen orduan, informazio alderdikoia ematen zutenen kontra: eta zuzenean eskuindar aldizkari horren jokabide gaiztoa gaitzesten* zuen, Iniestaren pastoral joera ontzat emanaz. Bilera honen etsaiek, ordea, ez dute amore* eman, eta —ospatu behar ziren bezperan, hain zuzen— Gobernuak berak debekatu du, hortik Gobernuaren kontrako jokabide batzuek* sor litezkeelako, ordenu publikoaren kaltetan.

Elizaren protesta ez da berandu etorri. Iniesta jaunak ohar bat zabaldu zuen berehala, Gobernuaren erabakia gogor eginez, eta legezko arauen aldatu behararen premia agertuz, giza eskubideak eta libertate premiazkoenak erabat* haintzakotzat* hartuak izan daitezkeen.

Hogei ta bi parrokiatan, bestalde, ez zen mezarik eman martxoaren 16an, igandez. Tarancón-ek berak ere, «gertakari larriok» zirela eta, idazki bat zabaldu zuen, diosesiko elizetan irakurria izan zedin. Bertan, Kristoren ordezkoi denez, apezpikuaren erantzunkizunaz* mintza-

tzen da; eta ez dutela eskubiderik aitortzen du, ez apezek beren eskuz kristau herriari mezak ukatzeko, ez eta Gobernuak ere kristau batzarre bat debekatzeko. «Debeku hau —dio artzapezpikuak— nigargarria da, eta ezin sinestekoa, bere burua katolikotzat eduki ezezik,* horretaz harrotu ere egiten den Estatu batengan». Kementsu ukatzen du gero, bilera honekin herria nahasi nahi izan dela diotenen ustea, eta arazo hau Elizaren egitekoaz kanpo dagoela diotenena ere.

«Betebehar bat da guretzat —dio Tarancón-ek— gizarte burrukak sofritzen dituztenei entzutea eta Ebanjelioaren argiaz argitzea». Segidan, gizon guztiei eta batez ere behartsunenei zor zaien errespetua eskatzen dio Gobernuari. Azkenik, gauzak bide zuzenetik konponduko direlako ustea eta itxaropena agertzen du, eta «Vallecasko Kristauen Lehen Batzarre» hau bere bideari jarraikiko zaiola.

Ezin uka, Vallecasko gertakari hauek Elizaren eta Estatuaren artean dagoen tirabira gogorra agertzen dutela, eta beharbada etenaren arriskua ere. (Jose Goiria).

Italiako kristauen eta komunisten arteko harremanak

L'Osservatore Romano egunkaria gogor ekin zaio Ernesto Pisoni Milaneko elizbarrutiko* ordezkariari.* Vatikanoko kazetaren haserre, Pisoni jaunak alderdi komunistaren probintzi mailako batzarre batetan parte hartu duelako izan da. Batzarre horretan bere izenean mintzatu zen. Halaxe aitortu du berak ere. Ideologia aldetik katolikoak eta komunistak oso bereiz* daudela esan zuen. Baina probreenganako maitasun berak eta langileria laguntzeko gogo bizi berberak biltzen dituela batak eta besteak.

Horrelakoetan honez gero ohiturazko eta topiko bihurtu diren esaldi hauk, Italiako zenbait tokitan zentzu politiko konkretu batez ulertu dira: halebria,* komunistek duela bi urte Kristau Demokraziari eskaini zioten eta oraintsu berriro ere eskaini dioten «Compromesso storico» delakoaren defentsa bezala.

Kristau eta komunisten arteko elkarrizketarik ez da posible, politikazko interes jakin batzuk «kutsatu» gabekorik behintzat. Baina politika «kutsurik» gabeko elkarrizketaren atzetik dabilenak hobe luke, elkarrizketarik ez duela benetan nahi argi eta garbi esatea. Bestalde, inozitate ez da permititua honez gero. Politikak ere ba du sarbiderik kontrako ideologiaren elkarrizketa horretan. Hori ere kontutan hartu beharrekoa da, batzuek edo besteek erabil ez gaitzaten. (Manu Pagola).

Jesuitak Unibertsitateetatik ihesi?

Buenos Airesko «El Salvador» Unibertsitatea utzi eta sekularren eskutara pasa erazi dute jesuitek. Unibertsitate hau, duela hogei ta bost urte eraiki zuten. Eta orain Unibertsitate mailako lana uztea erabaki dute, pastoral eginkizunei hurbilagotik heltzeko, eta hain zuzen Buenos Airesko haurzunerik probeenetan.

Azken urte hauetan behin eta berriro gertatu da hau jesuiten artean. Eta ez da azkeneko izango, noski. Ba dirudi, haize berri hauek Konpainiaren aurpegia aldatuko dutela; eta jesuitak ez direla Eliza boteretsu eta aberatsaren sinbolo izango. (Manu Pagola).

daude, dagoz
dio, deutso
gaitzaten, gaiezan
geneduzkan (geneuzkan),
geunkazan

zaie, jake
zaio, jako
zioten, eutsoen
zitezkeen, eitekezan